



GIUSEPPE CABIZZOSU

BIBLIOTECA

www.giuseppcabizzosu.it

Vincenzo Simula

(Flussio -)

Poesie scelte in lingua sarda



GIUSEPPE CABIZZOSU

BIBLIOTECA

www.giuseppcabizzosu.it

Vincenzo Simula

(Flussio –)

Poesie scelte
in lingua sarda



GIUSEPPE CABIZZOSU

BIBLIOTECA

www.giuseppcabizzosu.it

Vincenzo Simula

(Flussio –)

Poeta di Flussio di cui si ignorano i dati anagrafici. Le poesie che vi presentiamo ci sono state recapitate da un amico giapponese del nipote Giovanni Baldinu deceduto in Australia.

POESIE DI VINCENZO SIMULA

3

INDICE

- Tempesta.
- Adiu amore.
- Acrostico.
- Po unu sorrisu.
- Satira.
- Sonettos a Maria.
- A Flussio terra amada.
- A Zudas segundu.
- Anima casta.
- Lugh'e luna.
- S'orfaneddu.
- In morte de unu riccu avaru.
- Desolazione.
- A sa carissima e semper viva memoria
de mamma mia.
- Terzinas dedicadas a Francesco Zoroddu.
- S'essere umanu.
- In morte de sorre mia Pitana.

- Poveru diplomadu.
- Modellu in onore de S. Giuanne Bosco.
- Blasfema a un avaru.
- A su alveri meu poeta e criticu de arte.
- Notte trista.
- Oratzione funebre in morte de su poeta Remundu Piras de Iddanoa Monteleone.
- Augurios de Pasca a unu zegu naschidu.
- A Lughia su primu amore.
- In morte de sorre mia Pitana.
- A una giovanedda.
- Ingratitudine.
- Requisitoria.
- A una ricca istupida.
- Modellu a Santu Lussoriu.
- Argumentu e pregadoria.
- A sa matessi Tzia.

TEMPESTA

Tottu s'interu universu,
armadu de ira funesta,
paret ch'in custa tempesta
cherzat su munnu sommersu.

Saettas incandescentes
sùlcan s'oscuro orizzonte
e franan dae su monte
sas roccas chi fin pendentes,
e distruen irruentes
su ch'incòntran a traversu,
e in sas undas immersu
est d'ogni bassu pianu
e paret un'oceànu
tottu s'interu universu.

Violentissimos 'entos
bàttin sas nues infrantas;
trùncan frores e prantas
tùrban pastores e armentos;
in mare sos bastimentos
lòttan cun s'unda molesta,
e senza fagher protesta
si rintànan cun paura
ca est oe sa natura
armada de ira funesta.

Paret chi uguale sorte
tocchet a 'ogni mortale,
e siat universale
desolatzion'e morte.
Su coro, su pius forte
trèmat, reclinat sa testa
mirende sa terra infesta
de turbine furibundu.
Chi si distruat su mundu
paret in custa tempesta!

S'idet s'aera oscurare
ch'incùtit vivos terrores;
e cun tremendos fragores
paret chi cherzat crollare.
Si dispèrat de torrare
su chelu serenu e tersu;
sos puzones tristu versu
càntan in s'insoro litu,
ca paret chi s'infinitu
cherzat su munnu sommersu.

ADIU AMORE

In custu supremu istante
De inaudidu dolore
Ti narrer adiu amore
M'abbizo enner mancante!

Una fortza inaudida
M'abbattit de improvvisu;
Mi s'isbianchit su visu
Mancare intendo sa vida!
Angosciosa dispedida
Vera iscena istratziente
Agitadu e ispasimante
Sento trafittu su coro,
E solu sa morte imploro
In custu supremu istante.

Ite funestu uraganu
In s'anima ite tempesta,
Chi mi dat fumos in testa
Che unu ardente vulcanu!
Non podes, no, coro umanu
Resister custu rigore,
Ca a tanta forza maggiore
Esser forte non risultas;
E languente sussultas
De inaudidu dolore

In ojos m'ido unu velu,
Lagrimas verso cun penas;
E curren intro sas venas
Sento su mortale gelu.
Pro me mudadu est su chelu
In infernale furore,
Vanu est chi succursu implore
A custu dolu profundu!
Ca adiu est dare a su mundu!
Ti narrer: adiu amore!

Mezus ch'in pagos momentos
S'abbelzat pro me s'abissu!
A su mancu ponzat issu
Sa fine a tantos turmentos!
Già dolores crüentos
M'hazis provadu bastante.
Esser de vivere amante
Supplitziu no est tzertu
Happo abbastanza suffertu;
M'abbizo enner mancantel

ACROSTICO

Salve modellu de sos sacerdotes,
 Esemplare figura de ammirare
 Bastante ricca de morales dotes!

Animu rettu, nobile esemplare
 Ses de operas dignas cristianas
 Tottu protesu a su bonu operare

Inimigu 'e ricchessa e pompas vanas
 Amante e protettore 'e sos afflittos
 Neutru in sa dissidias umanas.

Onore giustu a sos giustos meritos
 Medas t'han dadu ca tenen presente
 In mente issoro sos gestos iscrittos

Annos de vida e salute fervente
 Gesusu ti cuntzedat bonos chentu
 Grazias cant'aspiras in sa mentel

Insigne chi arrives po talentu
 A su cardinalitziu cordone
 Felice cun giubilu e cuntentul

E fettas in sa pia mansione
 Lughe divina in sos coros oscuros
 Inue regnat sa perditzione,

Cuglieri in sos seculos futuros,
 Esultet chi t'hat dadu sos natales,
 Osannas innaltzende imperituros

Nammi però puite tzertos tales
Operan de te a su revessu
Mentr'hazis mansiones uguals?

Aman s'agiu, sas lites, s'interessu
Similmente a giudaicos mercantes.
Tottu est custu s'insoro progressu!

Invece tue cun provas lampantes
Connottu ses e dae medas distintu
Operatore de ideas zelantes

Sempre t'happo ammiradu e so cunvintu
In custu casu errore non fetta
Mancari hapemus d'errare s'istintu!

Unu versu cust'umile poeta
Leale in sa lieta ricorrentzia
A tie mandat: gradilu e atzetta

Vivas preces a chelu cun cussentzia
Innaltzemus, in breve, po torrare
Nostra cudda perdid'indipendentzia!

Cristos fettat cust'ira dissipare
E torret tra Istados s'amicitzia
Nende, comment'hat nadu, a nos amare.

Zelu, fraternidade cun delitzia
Ognora regnet, però cun giustitzia.

PO UNU SORRISU

Happo 'e ti narrer dirittu
c'has fatt'erròre, m'iscùsa:
si innamoràda illusa
ti vantas sentza merittu.

Fidi una die 'e albile
de campagna in d'una festa,
chi cun sos fumos in testa
de s'edàde giovanile,
t'happo sorrisu gentile
e fortzis fattu s'oghittu;
e tue de su delittu
m'has de Cupidu imputàdu:
ma non so innamoràdu,
happo 'e ti narrer dirittu!

Pro unu solu isguàrdu
de me ti ses invaghida,
de tè matessi ferida
ti ses, de amoròsu dardu;
frena s'impetu galiardu
prus modos onestos usa
po chi non restes delùsa
de tanta tzega follia!
Ca si sognas d'esser mia
has fatt'erròre, m'iscùsa!

Custas galàntes imprèsas
po lode, tue decantas;
senz'esser beru ti vantas
de sas ottentas pretèsas;
ma sas tuas finintèsas
non sun atteru che rusa!
Prestu retira s'accusa
sa chi m'has fattu, impunida.
Ses gasi tottu sa vida
Innamorada e illùsa!

Sentza connoscher filàdu
ischis oldire sas tramas;
si sas tuas folles bramas
happo in cuss'ora appagàdu...
est pro chi m'has invitàdu
e accettèsi s'invitu;
però si cheres profitu
de sas tales avventùras
t'isbaglias! Si non misùras
ti vantas sentza meritu!

SATIRA
(PO UNU LEONE FUIDU DA SU CIRCU)

Comente una furia est fuidu,
sas sannas ammustrènde cun furòre...
Na chi seminaiat su terròre,
e pius d'unu à tremàdu e timidu;

invece s'es che neula ispàridu
intèsu non si nd'à pius sentòrel..
Domandende su tou domadòre
m'hat rispostu: e chie prus l'hat bidu!

Ma a cua m'hat nadu: est oportùnu,
de custa norma non fettas a mancu
e ti servat po una letzione...

Perigulòsu est cand'est digiùnu,
ma si giughet piènu su fiancu
mancu s'ammentat ch'est unu leonel..

Chi non fit una bestia molesta
Dae sett'annos faghet, fit convintu
Chissà cale dimoniù l'hat'ispintu
Si ponner tzeltos grillos in sa testa.

Fortzis su richiamu e sa foresta
Li hat ischidadu s'atavicu istintu?
O hat bidu tremende su retzintu,
cand'este infuriada sa tempesta!

Totu sos salmos non finin in gloria!
fuas s'hat bidu, attere che i cussa
chi han postu su "Circu" a repentagliu...

Si de lu catturare han sa vittoria
a da chi han a bessire a catza russa,
hat a finire in.. atteru serragliu!..

SONETTOS A MARIA

I

Comente sa fulgid'aurora
Ch'ispuntat imponente e luminosa
E risvegliat cun lughe radiosa
Sa terra dae sa notte sognadora

De aprile in su manzanu cando Flora
Cumparit in sos campos maestosa,
E sos puzones cun s'ala donosa
Bolende cantan cun boghe canora!

E in su chelu giaru e infinitu
Brillat s'astru gigante risplendente
Illuminende ogni recessu abitu.

Cando cumparis tue sorridente
Rivestis vida in d'ogni coro afflittu
E s'intendet riviver novamente

II

Est ineguagliabile tesoro
Su trattu nou nobilmente grave!
Sa oghe tua est musica suave
Chi sonat in sas fibras de su coro

Ogni frase, ogni gestu, ogn'accentu
Ch'esprimes cun aria serena
Est cosa veramente non terrena
Ca paret un'angelicu cuncentu

Ses Minerva de vera sapientzia
Famosa che Susanna in sa puresa
E de Venere tenes sa beltade

In te regnat sa nobile prudentzia
Su rispettu, sa grata gentilesa
Sa mansueta docile bontade

III

De risaltu a sos donos de natura
Chi tenes finemente isquisitos
Sun sos ateros nobiles meritos
Chi t'has acquistadu cun bravura

Succurrinde cun grazia e premura
Sos sofferentes poveros afflittos
Ch'intrende tue in sos issoro abitos
Iscumparit d'incantu sa tristura

Dende s'obulu tue los esortas
Cun sabios cunsizos tantu bonos
Chi fintzas sos morentes accunnortas

Cun sos faeddos menzus de sos donos
S'indigente miseria cunfortas
Ca d'eccelsa misura sun padrones

IV

S'andare isveltu, su corpus isnellu
E s'isguardu francu e penetrante
Su lussuosu bestire elegante
Cantu tue ses bella issu t'est bellu

Qualunque siat su indumentu
Ch'indosses gentilissima Maria
Attonat cun sa tua simpatia
Coment'un'artisticu oramentu

Unu colore vividu de rosa
Dad'armonia a sos lineamentos
De sa tua simpatica figura

No has bisonzu de cipria odorosa
Né de colores fattos cun inventos
Tottu t'hat dispensadu sa natura

V

Cando t'intendo chi cantas giuliva
Cun suaves melodicos accentos
M'inspiras in su coro sentimientos
De fortz'irresistibile attrattiva

Lusingher'armonia suggestiva
Piena de pateticos cumentos
Che Circe chi cun miticos inventos
Sos marineris tiraiat a riva

O de cantu tou non t'abbizas
Ch'est un'arcana attraente malia
Ch'inebrias su sensu e paraliza

E in su regnu de sa fantasia
Trascinas d'ogni coro ed'elettrizas
Estaticu a sa tua melodia.

A FLUSSIO TERRA AMADA

I

Comente una dultze rimembrantzia
O che musica placida e serena
In d'una aera d'aromas piena
Chi nde mandat zefiru sa fragrantzia

Gasi matessi m'armentat s'infantzia
De custa vida umile e terrena
Siat in oras de gioia o de pena
Ti pentzo terra'amada in lontanantzia

Che litteras incisas in su duru
Marmu, chi no cancellat cun sos annos
S'indelebile ammentu imperituru

Gai bos tenzo impressos in sa mente
Tottu bos penso, minores e mannos
Cun affettu fratemu reverente

II

Sempr'hapo tent'in me su car'ammentu
De cumpagnos comares e fedales
Sos chi cun sentimentu fraternales
Los tenzo impressos in su pensamentu

Penso a sas oras de divertimentu
Passadas in allegros carnevales
Chi po me mai torran sas uguals
Oras felices de tantu cuntentu

Gai da su mortale in custu mundu
Bolat prestu s'umana fantasia
Cantu sa realtade biet a fundu

Non torran, no, ca po fatalidade
Bolat lestra s'umana pitzinnia
Cand'e vint'annos che passat s'edade

III

A t'ammentas, Flussio, cando appena
Degheott'annos de vida tenia?
Cantas ottavas t'improvvisaia
Mancari umiles, cun limpida vena

De tottu noncurante, e sa terrena
Vida, it'est ch'esserat non pensia
E oe s'improvvisada poesia
Bolada ch'est da me: s'est fatta anzena

Cando creia viver pius lietu
Po calchi superada sufferentzia
M'agato pius tristu e inchietu

In coro sento su precoce gelu
Mir'ogni cosa cun indifferentzia
Mancari mi presentene su chelu

IV

Sas esigenze de sa vida mia
M'hana custrintu a non t'haer presente
Ma t'amo su matessi caramente
Comente ch'eo presente ti sia

E ti sogno cun grande nostalgia
Da inue m'agato, in continente
Tue creo de me ugualmente
Chi cunserves s'antiga simpatia

Non creo no chi su ricordu ingratu
De me hapas serbadu intro su coro
(Si tantu po su male c'hapo fattu!)

Semper m'has'ammiradu cun rispettu
Dimustrendemi amore cun decoro
Po cussu ti tributo immens'affettu

V

Rimembro tottus sas cosas passadas
Terr'amada, in su mentres chi t'iscrio
Vivas intro sa mente mi l'has bio
Sas sofferenzas, sa gioias provadas

Narami: e cantas bellas serenadas
Sunu, sas chi mi depes, o Flussio?
E oe sos sonettos chi t'imbio
Gradilos, cant'a mie tue aggradas.

A ZUDAS SEGUNDU

De Satan'has su visu
Falzu coment'e Zudas
Uguale a Cainu traitore
Cun satanicu risu
Faeddas e saludas
E a istentu cuas su rancore
Ma cando cres chi pintas
Sas gentilesas fintas
Po truccare s'attent'osservadore
T'isbaglias miserabile
Cando nessunu che tue cres abile

Si sa malvagidade
T'esseret cancellada
Non ti restat de bonu alcuna cosa
Nessuna facultade
De bellu in te non b'hada
Solu s'anima turpe e cangrenosa
Sa cale ti costringhet
Zegamente t'ispinghet
Fagher cussa vida ignominiosa
Ch'est oggettu e disprezzu
E ischiffu de tottus e ribrezzu

In s'anima su limu
Has de superbia vana
Sa chi ti rendet unu mostu bruttu
Ca ses naschidu in s'imu
De sa bassesa umana
Sol'in s'esser malvagiù ses astutu
Sa simile tzippaia
De babbu e mamma iaia
Non podiat bogare mezus fruttu
E t'hana tramandadu
Su chi han issos puru ereditadu

Abbastanza ses notu
Chi passas po traschia
In su breve mundanu itinerariu
De malu faghes tottu
De ladru e de ispia
D'impostor'ispergiuru e de sicariu
Tue ses de su restu
De ogn'omin'onestu
Naschid'in custu mundu a sa contrariu
E cantu in s'universu
C'hat de bellu l'has tue a sens'inversu

E cantas boltas faghes
Su fintu modu bellu
Imposturas contend'a meraviglias
Inue sun sas paghes
Semenas su burdellu
Discordias poninde in sas famiglias
Ca tue ischis sas artes
De fagher ambas partes
De odios, discordias e puntiglias
Ca de cussu ti satzias
In domo non teninde atteras gratzias

Seculare retaggiu
Est s'atavicu istintu
Ecco s'unica tua possidentzia
Solu non ses malvagi
Ista tzertu e cunvintu
Ca provvenis da tale discendentzia
Diffattis sos presentes
Prus custringtos parentes
Han che tue uguale sa tendentzia
Naschidos da su germe
Ischiffosu prus meda de su erme

Infame, d'impostura
Solamente ti satzias
Po chi pane non tenzas no t'importas
Ispettru d'isventura
Morte, penas disgratzias
Paret c'anue intras tue apportas
E che randagiu cane
Senza mere né pane
Sa conca ch'intras in tottu sas portas
Attentu e circospettu

Isultas, miras cun modu suspettu
Sos prus bassos difettos
Ti si legent in fronte
De sa peus indigna creatura
Tu'ischis sos segretos
De idda e de su monte
De murrunzos, de brigas e de fura
Ca ses sempre abitadu
Cun zent'e paris gradu
Simil'a tie puzzante lordura
Indignu cristianu
D'esser immesu a su consortziu umanu

Has'a tenner sa mesa
Sempre isprovvista e seria
Simbulu de tremenda caristia
Si campas a betzesa
Rimorsu cun miseria
T'han'a fagher fidele cumpagnia
E tando cun sa mente
Has'a tenner presente
Sa tua mostruosa pitzinnia
E pius de sa chea,
Ch'est fea, has'a fagher morte fea.

ANIMA CASTA

Che una viva lughe radiosa
Ch'in nott'oscura traversat s'aera
Bolat s'anima nobil'e sintzera
Su corpus castu lassend'a sa losa

Bella fortuna chi su faltzu mundu
In sa mezzus'edad'hasa lassadu
Po chi giust'espansivu né giocundu
No est comente tue l'has miradu

Sa dura tribuglios'umana vida
No l'has connotta, troppu fortunada!
Deus s'anima casta ti l'hat dada
E a Issu cast'e pura l'has rendida

Lontan'e ogni umana contierra
In custa breve vida ses istada
C'a bolu ses che anghela passada
Ch'isfiorat cun sos pèes sa terra

Ahi cantos distruttos ideales
Su t'ider goi prestu in sepoltura
Ma fis distinta da e criatura
Chi tue no fis prenda 'e sos mortales

Mi paret chi ancor'hapa presente
Su tou castu angelicu sorrisu
Ca un'anghela vera 'e paradisu
Parias tue tra s'umana zente

Non paret beru, no, ch'estintu in tottu
 Siat su viver tou sorridente
 Fortzis rivives tue in differente
 Lontan'astru c'a nois est ignotu

Ah si poderas in su campusantu
 L'esprimer'una oghe da sa losa!
 Si pustis morte c'hada attera cosa
 O finit cun sa morte tottu cantu?

M'accorat e mi torturat sa mente
 Cando pentzo a sa fine misteriosa
 Si oltres de sa morte paurosa
 B'hat ateru, o pois non b'hat niente?

Mi turbo cando penso a s'ideale
 De cos'incumprensibile non b'ida
 Chi destet su sepoltu a noa vida
 A pustis de su sonnu sepolcrale

E ch'intro s'immens'adde Giosafatte
 A comente nos narat s'Iscrittura
 C'ogni estintu cumparid'in figura
 Dannada siat s'anima o beata

Misteriosa una fortza m'invocat
 Ch'intenda s'argumentu in cust'iscrittu
 M'ab'ite? Est a toccare s'infinitu
 A manu, su chi mai non si toccat

Ca cando pens'approfondire prusu
Su sensu in sa non facile contesa
Una nue 'e misteru e d'intzertesa
M'attorniat lassendemi confusu

Est vanu si sa mente s'apprufundat
Chi una parte favorire chelza
C'a qualunque ala chi m'offelza
Su dubbiu de errare mi circundat

Si calchi dottu tra s'umana razza
Chelzat a una parte tortu dare
Est cuddu chi si vantat mesurare
S'abb'e s'immensu mare a tazza a tazza

Termino, no est custu su momentu
Troppu giovanu so' po cummentare
Similes cosas, ma bramo torrare
Si vivo da e nou a s'argomentu.

LUGH'E LUNA

Luna da su firmamentu
 Ch'illuminas baddes cimas
 Ispirami dultzes rimas
 Dammi sublime talentu

Est d'argentu s'orizzonte
 Su chelu serenu est tersu
 Brillat s'inter'universu
 Cale cristallina fonte
 Musas da s'Olimpu monte
 Falad'in custu momentu
 Dademi, s'hazis portentu
 Versu cun boghe opportuna
 Chi cante cust'ater'Una
 Luna de su firmamentu

Tue gentile Urania
 Fulgidos astros m'addita
 Erato a s'estru m'invita
 S'erotica poesia
 Cun sa lira Polinnia
 Notas suaves esprimas
 Chi sas campagnas opimas
 Mandent s'aroma fragrante
 Po te Diana brillante
 Ch'illuminas baddes cimas

Istellas ch'in s'infinitu
Eternamente vagades
E de lughe dispensades
S'umanu dormente abitu
In custu felice situ
Vivent sas mias istimas
Puras, sintzeras sublimas
D'un'affettu sacrosantu
Po cussu, notte d'incantu
Ispirami dultzes rimas

S'est ch'in su candidu lettu
T'ischidas in custu istante
E t'intendes palpitante
De gioia su coro in pettu
S'ischeras cun cant'affettu
Su coro meu s'intentu
Bramat in custu momentu
Sa tua casta figura!
Angelica creatura
Dammi sublime talentu.

S'ORFANEDDU

I

Mischinu, cale pallidu fiore!
Cando tristu ti miro ti presentas
Cum cussas logoradas bestimentas
E i sas laras de chera in colore

Lentu su passu privu de vigore
Bettas cun cambas tremulas e lentas
Paret chi grave già su pesu sentas
De cust'ortanidade su dolore

Ahi crudu inesorabile destinu!
Fortzis a tie puru at semenadu
Che a mie de ispinas su camminu

E t'at po pena a viver cundannadu
Po chi piangas e sufras de cuntinu
Ca s'unicu cunfortu t'est mancadu

II

Mai t'hap'idu un'allegru sorrisu
Martire e infelice adolescente
Cuntentu calchi olta raramente
T'ido ma prestu mudas d'improvisu

E a s'iscarnu macilente visu
Ti torrat sa tristura prontamente
Ca serrad'hat po te man'indolente
Sa port'e s'infantile paradisu

O teneru e innotzente coro umanu
D'atteru non ti nutris che d'isdignu
E trattamentu crudele e tiranu

No una dultze frase, unu carignu
T'intendes dare cun docile manu
Né unu sol'isguardu benignu

III

Ahi, cando t'ischidas in su lettu
Cun cale coro saludas sa die!
Giamare tias cherrer – ma a chie?
Fortzis s'anghelu nobile e diletu

Chi cun islanciu de maternu affettu
Lestra curriat s'intender'a tie
E basended'in fronte rie – rie
T'astringhiat a s'anelante pettu

Pro te nottes insonnes e istentos
Gioinde in sa pius dura sofferentzia
Po dare a tie vida cun cuntentos

Cun cantu bellu garb'e diligentzia
Ti estias sos pulidos indumentos
E cun canta ineffabile passentzia!

IV

Ahi, mi paret'ider in su lettu
Tremante ischidared'ogni die
Cando cumparrer ti bies a chie,
priva de dociles'e de affettu

(Anzi t'ider piangher l'est diletto
L'est gioia ogni pena dada a tie)
Van'est chi ti mustres rie – rie
Ca de brunzu hat po te su coro in pettu

Indifferente, senza diligentzia
T'affranzat cussos bruttos indumentos
Rude, senza bontade ne passentzia

Faghindedi provare sos istentos
Gioid'issa a sa tua sofferentzia
Privendedi de tottu sos cuntentos

V

Cando gioghende sos compagnos miras
Cun sos baloccos de sa pitzinnia
Cun canta illimitada bramosia
Sos divertentes trastullos ammiras!

De los posseder sognas e aspiras
Ma da sa divertente cumpagnia
A malu coro ti leas sa vida
Ti che cazzant e solu ti ritiras

Cando de birichinos t'ido in mesu
Dendedi ispintas, punzos e maltrattos
Debile, senza briu e indifesu

Torras a dom'e raccontas sos fattos
A chie aggravat de penas su pesu
Cun colpos e rimproveros ingratos.

IN MORTE DE UNU RICCU AVARU

Dormi lupu famelic'usurpante
Ca pius non funestas né usurpas
Rend'a sa terra sas superfluas purpas
Fruttu de s'ingordigia esorbitante
Oe sol'in sa tumba in cust'istante
Cun tegus inserradas sun sas culpas
E su tou opulente bentre vastu
Est de ischivos bermes unu pastu

Sa terra t'hat che malvagiù ospitadu
E t'had'ugualmente seppellidu
Gioias e benes sa terra t'hat dadu
A issa bene e gioias has rendidu
Subra issa vivias accanidu
E in issa ti ses annientadu
Iscumparinde de te ogni traccia
Ammentende sa tua infame faccia

Imbroglios e illecitos balanzos
Finalmente po te sunu lassados
Cun tancas, binzas domos e cunzados
E sontuosos e lautos pranzos
Parentes, paesanos e istranzos
Che unu brancu e lupos affamados
Benit po si divider su tesoro
Cuddu chi non fi tou né insoro

Anue t'est andadu su furore,
 S'orgogliu sa superbia e sa furia
 Sempre ti agataiant in sa curia
 Ca ognunu po te fit depidore
 Parias de su mundu possessore
 Dend'a tottus faeddos de ingiuria
 Ma po te est finida ogni udentzia
 Po chi t'est fatta s'eterna sententzia

Sempre t'agataian litighende!
 Finalmente has finidu lites, gherras
 E né pius cumparis in sas terras
 Sos tuos dipendentes maltrattande
 Che insensadu currinde e gridande
 Che trubadore de cazza in sas serras
 Cun s'isguardu avidu iracundu
 Parias ingullinneddi su mundu!

Cando t'idia ruzzu e provocante
 S'ischeras cantu ischiffu mi faghias
 Cando prus de una olta ti ridias
 De su miseru cibo 'e su bracciante
 Nend'a tottus: fammidu e mendicante
 Sa povertade la dispretzaias
 Mentres in sa famelica zenia
 Mandigaia po chentu tue ebbia

Tue in tottus difettos e males
 A personas e cosas lis narias
 Pubblicamente rimproveraia
 Giamend'ingiustos sos attos morales
 Ca sos sette peccados capitales
 Intro su coro tou albergaia
 Fintu malignu operende tottue
 Nend'a chie non fit su chi fist tue

Cando creias già postu su velu
 A su tou non lucidu passadu
 E a forzas de ingannos procuradu
 In custa terra t'haia su chelu
 Fremer t'intendes de mortale gelu
 Cuddu coro chi mai t'hat tremadu
 Ch'insensibile a tottus sos lamentos
 Gioiat bider atere in turmentos

Un'acuta paralis fulminante
 T'abbatit che leone feltu a morte
 Cando fisicamente fis prus forte
 Pius riccu che mai e prus gigante
 T'immobilizzat sa limba in s'istante
 Cudda ch'in faccia de s'umile sorte
 Esprimiat sas prus infames taccias
 De rimproveros, beffes e minaccias

Como sa limba tua prus non bragat
Impostora, perversa e ispacconera
Né in sa dionesta violera
Pius su corpus tou si divagat
A s'impunidu impunemente pagat
Sa morte inesorabile e fiera
Sa chi non timet né riccu né forte
Sa chi non mudat po nemos sa sorte

Non ti satzias prusu né sollazzas
In sa vida po te chi fidi incantu
Po te fit gioia s'anzenu piantu
Sas isventuras de tottus sas razzas
Né da sa janna poveros che cazzas
Ca tue ses cazzadu in campusantu
Accantu a sos umiles colloccadu
De cuddos c'has in vida disprezzadu

Totta sa tua terren'esistentzia
Fid'unu mare d'occultos intrigos
Capurione de bravos amigos
Chi tenian che tue sa tendentzia
D'annientare cun sa violentzia
A i cuddos suppostos inimigos
E tue sempre capu in sas congiuras
Esseren issas de mortes o furas

E cantos innotzentes hana pianu
 Sas curpas tuas orridas, nefandas
 Cando participaas a sas bandas
 De sos chi distruiant tottu cantu
 E tue da galera sempre frantu
 Cun summas de inari e raccumandas
 E non cuntentu chi ti salvaas
 A calcunu innotzente imputaas

Sa morte tua dolore né luttu
 In nemos hat lassadu de siguru
 Su tou infame truncu d'ispergiuru
 Rampu no hat bogadu, frore o fruttu
 Fortunai Ca cun tegus ti c'has giuttu
 Unu retaggiu nefastu e oscuru
 E prus oscuru lassende s'amentu
 C'ad'esser malaittu ogni mamentu

A sos esseres che tue, sa natura
 Lis neghet in sa terra naschimentu
 E sos viventes privet d'alimentu
 Chi nutrit d'ogni umana creatura
 Prantu, presone, pestes sentza cura
 Subra issos proat a d'ogni entu
 Sa morte d'inflessibile dominiu
 Fettat inesorabile isterminiu.

DESOLAZIONE

È poite, patimentos
A custu coro già afflitu
B'enides senza meritu
Aggiungher nòos turmentos?

Che unu mare in tempesta
Coro puite ti m'agitas?
Mente, poite mi dittas
Tristas ideas funestas?
Aiò, cunfortu mi prestas
In custos graves momentos
Già c'a sos mios lamentos
Nissunu dà cunfortu
Fortzis mi cherides mortu
È poite patimentos?

So cale rampu truncadu
Da s'orribile bufera
Ch'in balia de s'aera
Cun furore est trasportadu
Tristu piang'appartadu
Solvingu che belv'in litu
È senza alcunu delittu
Suffro s'ingiusta catena
Ma poite tanta pena
A custu coro già afflitu?

Proite torrades in mente
Rimembrantzas suaves
Fortzis po render pius graves
Sa penas de su presente?
Lassade chi no m'amente
De sas gioias send'afflittu
Po chi pius derelittu
Mi rendet su ostru amentu
E po maggiore turmentu
Benides senza meritu

No unu solu sorrisu
Da nemos m'ido rivoltu
Tottu su mundu iscunvultu
S'est po mè d'improvvisu
Si mudat sa zente in visu
In penas sos godimentos
A montagnas e mentos
Esprimo su tristu cantu
Già c'a su meu piantu
S'aggiunghene nòos turmentos.

**A SA CARISSIMA E SEMPER VIVA
MEMORIA DE MAMMA MIA**

Ispero chi su cantu dolorosu
Chi fatto pro iscrier tottu custu
Chi non ti turbet s'eternu riposu

Gloria tenzas, cant'eo disgustu
Hapo provadu da cando partida
Ti ses da custu bassu mund'ingiustu

Cun profundu dolore dispedida
Ti ses lassende a mie a sos affannos
A sett'annos de custa dura vida

E tue puru a sos vintisett'annos
Cando giuliva bestida de gala
T'han indossadu de morte sos pannos

Ahi, da cussu tempus a cust'ala
S'ischias Mamma cant'hapo lottadu
Contr'a s'infame zente e sorte mala

Sentza nessun'imparu abandonadu
Ecco sos annos de s'infantzia mia
E senza piedade maltrattadu

Privatziones de ogni zenìa
M'hana resu che martire innotzente
Infirmu senza tenner maladia

Ca una manu barbara indolente
 Hat leadu de domo su podere
 Tott'hat distruttu inesorabilmente

Tue si, Mamma, de domo fist mere
 Funtana cristallina de bontade
 Sabia in su domesticu dovere

Ca prus de prima ite siat cumprendo
 Su narre Mamma, nomen Sacrosantu
 E pius m'attristo si contu mi rendo

E custas rigas d'amaru piantu
 Bagn'iscrinde cun manu tremante
 Po te custu dolente meu cantu

Morta tue, sa tranquillidade
 In domo nostra po me si ch'est morta
 Regnende sa dispota crudeltade

In sos turmentos, pius d'una orta
 Mi sò accantu tou disizzadu
 Rinunziende a custa vida torta

M'ahimè, sempr'invanu hapo pregadu
 Ca po viver'in mesu a s'ingiustitzia
 Su fatale destinu m'hat lassadu

Cando m'ammentat s'edade primitzia
 Cun tottu su suffertu ingiustamente
 Lagrimas verso cun grande mestitzia

A custu coro tando adolescente
Canta pena hana dadu cun tortura
Senza difesa né parte dolente

Oh Mamma, da sa tua sepoltura
Si esseras bennid'a s'improvvisu
A su prantu 'e sa tua creatura

In d'un'iscarnu languente visu
Leggid'haias s'immensa angustia
De chie est priv'e maternu sorrisu

Ma non solu in sa trista pitzinnia
Su caru nomen tou hapo giamadu
Po c'ancora m'est sacru, Mamma mia!

Antzis oe, giovanu diventadu
Prus forte sa mancantzia intendo
De te chi pagu tempus hapo amadu

Ca oe mentr'iscrio so distante
Da sa paterna domo involontariu
Sentz'unu visu amigu è costante

Ca po me tott'est bennidu contrariu
Su tempus, cun sa sorte, e i sa zente
Custringhinnemi a viver solitariu

In d'unu lembu de su continente
Ue sas dies cun malinconia
Passo, da e sas gioias sempre assente

Sogno cun dolorosa nostalgia
S'amenu logu su nidu nadiu
Ma tue non m'isettas, Mamma mia!

Ahi, ite dolorosu triste adiu
A su logu natale l'hapo dadu
Versende caldas lagrimas a riu

Da nissunu parente saludadu
Pitzinnu, senza meta ne destinu
A s'ignotu avvenire abbandonadu

Po fortuna nutriu e nutro in sinu
Unu coro tempradu in sos turmentos
Chi sempre m'had'infusu de continu

Coraggiu in sos difficiles momentos
Ispirendem'in mesu sos ingannos
Sempr'onestos e bonos sentimientos

Sa morte m'hat mudadu visu e pannos
Ma mancu hapo po cuss'abbandonadu
S'onesta via de sos nostros mannos

Immune mi so sempre cunservadu
Da sas bassesas de s'umana vida
Poveru, si ma non disonoradu

Che anghelu custode de guida
Tue m'has vigiladu e m'has protettu
In cust'adde de lagrimas infida

Coment'e i su sole puru e nettu
Ch'illuminat sa terr'a raio d'oro
Tue m'has fattu lughe a s'intellettu

Cando pius piango e m'addoloro
In sos turmentos, tando prus m'ammentas
Dultze esortazione a custu coro

Cantu ses bella candu mi presentas
In su sognu chi paret realtade
Ma non pius cun cuddas bestimentas

T'ido falare da s'immensidade
D'unu serenu luminosu chelu
Bestida de angelica beltade

D'alas ti faghet su candidu velu
Iscultza e cun sas trizzas a su entu
Bolas a brazzos tesos cun anelu

Cun boghe dultze ma d'arcanu accentu
Mi naras cosas ch'eo non cumprendo
Prus pagu canto prus t'iscult'attentu

In cuss'ora pius contu non mi rendo
Ti narre cant'ispasimo e lagrimo
Sol'a s'amplessu sos brazzos t'istendo

S'istanca test'a su sinu t'opprimo
A bassa oghe po ti murmutare
Mamma! Immensamente eo t'istimo

Ma cando prus mi chelzo satziare
 De sa tua presentzia s'accisu
 Non mi permittis med'a ti mirare

Dultze mi das de nou unu sorrisu
 E cun sas manos candidas che nie
 Mi carignas sos pilos e su visu

T'ando leve t'innaltzas rie-rie
 Cale pumm'a sa bretza de beranu
 Estaticu in cuss'ora miro a tie

E t'allontanas pianu pianu
 Chi pius non ti bio sa presentzia
 Ma nde distingo sa forma lontanu

Finas a cantu sa bell'apparentzia
 Restat unu puntinu luminosu
 Chi perdet in s'ispatziu sa essentzia

Tando m'ischido delus'e pensosu
 Confusu cun su coro palpitante
 Chi mi turbat sa notte su reposu

Ma poite sempr'allegra in simbiante
 D'ogn'olta mi presentas, Mamma cara
 Mentr'eo suffro po te d'ogn'istante?

Aiò, si podes in sognu mi nara
 C'a tie t'est eternu godimentu
 Ogni mia terrena pen'amara

Ahi, s'esserat gai, cun cuntentu
Sacrifico sa vid'in su dolore
Po te m'had'esser gioia su turmentu

Già ch'in sa terra nessunu favore
Da me has tentu cara Mamma tantu
Comente cumpensare tant'amore?

Non bastat s'olocaust'e piantu
Chi sempre t'hapo offertu po tributu
Cheres po te pianga atteretantu?

Cantas afflittas lagrimas m'hat ruttu
Iscrìnde po te custa memoria
Pustis vint'annos faghindedi luttu

E già ch'in custa vida transitoria
Solu penas m'hat dadu su destinu
Assuness'happas tua eterna gloria

Si vivente m'esseret a vicinu
Cun tanta gioia tia cumpensare
Su latte chi m'has dadu da su sinu

TERZINAS DEDICADAS
A FRANCESCO ZORODDU
(OROTELLI)

In sa vida promittere e non dare
Non so, caru Zoroddu abituadu
Ca non m'han mai gai educadu

Tue da me non fisti ismentigadu
Solu pro culpa de s'ingrata sorte
Appo fintzas a oe ritardadu

Ca tres meses tenia sa cunsorte
Infirma d'una grave maladia
Lottende tra sa vida e i sa morte

E in s'ora chi plus isettaia
Unu momentu de vida serena
M'agattesi pientu 'e tribulia

Gai est cumposta sa vida terrena
Cand'isettamus delitzia e festa
Tando tenimus mistia e pena

E so da una a s'attera tempesta
Che marineri in s'infidu oceanu
C'affrontat sa procella plus funesta

Però gratzias a Deus soberanu
Pro como est salva sa cara esistentzia
De sa chi amo e adoro fitianu

Ca cun s'azzudu de s'umana iscentzia
Dae s'Onnipotente illuminada
Truncada s'est de su morbo s'essentzia

In Orotelli ite nova b'ada?
Bos auguro sanos e cuntentos
Chi bos agattet sa mia a s'arrivada

De gai sian sanos sos armentos
Chi tributende copiosos fruttos
Cumpensene fadigas e istentos

Mortalidade, puntiglios e luttos
Malintesos e odios antigos
Sian sempre tra bois distruttos

Mi ses amigu e mi sun tottus amigos
Cantos n'happo connottu e non connottu
Gai lu sian tantos inimigos

A tie iscrio ma istendo a tottus
Unu saludu fraternu e leale
Dae su prus mischinu a su pius dottu

E chi sa festa de su Santu Nadale
Da un angulu a s'atteru 'e sa terra
Nos mandet una paghe universale

A ti descriere novas de Monterra
Annada mala in cantu a sa pastura
Siat in badde pianura o serra

Randine e abba falan de s'altura
 Sos rios de sas baddes in s'ierru
 Current lagos faghinde in pianura

E su nostru superbu Monteferru
 Hat in sa vetta unu biancu mantu
 Annunziende precotze s'ierru

Mentre iscrio a tie penso intantu
 A famiglias umiles e afflittas
 Chi no han fogu e de pane unu cantu

Caru Zoroddu, si ispessu meditas
 Supra tantas miserias umanas
 C'han rizettu in sas domos poverittas

Cantas crudeles animas tiranas
 Bistidas de infame ipocrisia
 S'ispatzana pro essere cristianas

Cantu cinismu, canta idolatria
 Canta boida e assurda vanidade
 Esistin'oe in s'umana zenia

Su sestu de s'umana piedade
 De giustissia, amore e fratellantzia
 Est isparidu da s'umanidade

Cumbattere! Custa solu est s'importantzia
 Pro unu sacru e fraternu ideale
 Senza perder lottende s'isperantzia!

E s'in sa terra c'hat solu che male
Benzat su male in tottu condivisu
Distruinde ogni fortza partziale

Forza, coraggiu e animu decisu
Contra ogni implacabile avversariu
Chi nos hat po millennios derisu

A morte ogni infingardu temerariu
Opulente e dispoticu signore
Inimigu 'e su nudu proletariu

Bastat! E proseghide cun fervore
Prontos a sa Sardigna de s'appellu
Isperende in su tempus benidore

E già c'has disizzadu su modellu
Chi cantei a su fizzly 'e Zaccaria
Già ti l'imbio mancare non bellu

In Oristanis, a s'istamperia
Dae variu tempus l'happo dadu
Cun calchi atteru impiastu e poesia

E appena hat a essere istampadu
De cussu puru has a essere soddisfattu
E de sos muttos chi m'has domandadu

Cantu como t'imbio atzetta gratu
In pignu de fraterna simpatia
Custu cantu 'e terzinas male fattu

E si creides chi dignu ne sia
Torrare a cussu publicu eccellente
Custu dae bois dipendet ebbia

Termino saludende caramente
A tie cun famiglia e su restante
Chi fit de comitadu presidente

De Orotelli a dogni abitante
Unu auguriu in custa rima accludo
Che unu frade leale e costante
E a tie ti abbratzo e ti saludo.

S'ESSERE UMANU

S'essere umanu est che un'abissu
Oscuru, impenetrabile e profundu
Nisciunu in sé matessi s'est permissu
Lu cumpudare finament'a fundu

B'hat un omine onestu? Cussu est'issu
E a nisciunu si cheret segundu
Criticat sos errores de su mundu
Però mai sos suos hat ammissu

Tottue errorres e fallos bidimus
Senza chi "mea culpa" recitemus
A sa nostra cussentzia baltzana

Da sos ateros tottu pretendimus
Cuddu chi nois mai istados semus:
ecco "sa tara" 'e sa natura umana.

IN MORTE DE SORRE MIA PITANA

Cando appena affacciada
Ti ses a custa vida
Po libare sas gioias de s'amore
Ti bio preparada
Po s'estrema partida
Sende s'edade in su mezus fiore
Lassende custu mundu
E rendinde giucundu
In brazzos de s'altissimu Signore
S'ispiritu immortale
E a sa terra s'umbra corporale

Sol'haias vint'annos
E ses meses umpare
Fist cun su tou caru amad'isposu!
Cuddos matessi pannos
C'has portadu a s'altare
T'ido portare a s'eternu riposu
Ite ingrata fortuna
Chi de mele sa luna
T'hat cambiadu in sonnu tenebrosu
Mudende sa letitzia
In d'una immensidade de mestitzia

Connadu meu caru
Lassa chi condivida
Cun tegus custas oras de pianu
Ca est senza riparu
Custa grave perdida
De cudd'oggettu chi amaimis tantu
Unimus sas lagrimas
Po chi bagnen sas rimas
De custu dolorosu triste cantu
Po chi non sias solu
In cust'ora suprema de su dolu

Po ses meses ebbia
Tue l'has tantu amada
Cun tottu su trasportu de s'amore
E deo a sorre mia
L'hapo in brazzos portata
Cun affettu fraternu da minore
Custa sorre istimada
Cantas boltas ninnada
L'hapo cantende cun dultze tenore
Imitende su cantu
Quasi de sa mamma in tottu cantu

E oe impallidida
T'ido Pitana mia
Non comente in prima gratziosa
Esuberant'e vida
Piena d'allegria
Cun su puru candore de una rosa
Prite tottus nos lassas
E goi prestu passas
Da e su gratu talamu a sa losa?
In s'ora prus bella.
Oscurada ti ses brillante istella

Cara sorre Pitana
Cant'est friscu s'amentu
De cudda festa tua nutziale!
E oe sa campana
Cun sonu tristu e lentu
Annuntziat su tou funerale
Custa vida fallace
Unu sognu fugace
Est'istadu po te trista mortale
Po c'has godidu appena
Sa gioia e s'esistenza terrena

Custu colpu funestu
Su nostru genitore
Non podet resistire, sorre amada
In tumba tantu prestu
Lu ponet su dolore
Ca tregua de viver non li dada
Non bi balet cunfortu
Est biu, ma est mortu
Ca da candu ses tue sepultada
Pianghet ogni die
E si bramat sepultu accantu a tie

Cantu so affliggidu
Su ti bier versare
Caru connadu lagrimas amaras
Ca da su caru nidu
Ti c'has bidu olare
Cudda culumba da sas piumas caras
Ammentadi s'amplessu
Ch'in laras t'had'impessu
Cun cuddas suas già gelidas laras
Ca fu s'ultimu adiu
Chi t'hat dadu cun lacrimas a riu

Cantu sacrificare
Po te sorre diletta
Hamus fattu affrontende ogni intentu
Po t'ider arrivare
A sa felice meta
Ogn'isforzu s'est fattu cun cuntentu
Ahi destinu ingiustu
De zertu non fit custu
Ch'ispettaimis luttuosu eventu
Ma cun tantu fervore
S'eventu de su fruttu de s'amore

Ite restat'a mie?
Prestu bramo s'accabbu
De sa vida chi miro indifferente
Hapo perdidu a tie
E' su ider a babbu
Si lagrimosu in s'edade cadente
E deo tristu e solu
In mesu a tantu dolu
Brivu de sos c'amai caramente
Sa vida mi diventat
Unu pesu chi semper mi tormentat

Idriga mia intantu
Olvida su passadu
Perdona e ti perdono cun amore
Lassa ch'in su piantu
Cun coro istratziadu
Cun tegus condivida su dolore
In cust'ora presente
Cancella da sa mente
Si fintz'a oe m'has tentu rancore
Umpare pianghimus
Sa ch'est partida chi prus non bidimus.

POVERU DIPLOMADU

I

Ses a barbetta coment'una craba
Forte e robustu che pegus de soma
Ma faeddende su sardu idioma
Cunfundes s'alòe cun sa saba

Ca su diploma in d'una conca 'e raba
Balet cantu a una raba su diploma
Po te s'iscola est che cuddu c'a Roma
Andadu est e bidu no hat su Paba

Si de giudice haia mansione
Manc'unu liberu nd'haio lassadu
De sos chi fini in sa Cummissione

Ca sos chi han'a tie esaminadu
Fini de ainos unu campione
De professores estidos in gradu

II

Chi custu ti servat po esempiu
Po cantu in custa vida has'a campare
Tottu sos ch'intrana 'e Minerva in su tempiu
Non poden sapientes diventare

B'est calincunu chi vivet che un empiu
Eppuru indossat s'abitu talare
Faghinde a sa morale trist'iscempiu
E andat sa morale a preigare

Genuflessu, invoca ogni momentu
A sa Dea Bendada, ca est una
Chi s'issa cheret arrivas a s'intentu

Balet prusu unu grammu de fortuna
Chi non chimbanta chilos de talentu
Bastat esser naschidu in bona luna!

III

Connosco un antzianu professore
Ch'iscrittore si antat e poeta
E poeta no este né iscrivitore
Est solu unu filosofu 'e pinnetta!

Si fid'istadu 'e laghinza pastore
Hiat fattu figura pius discreta
Ma sa Dea l'hat fattu su favore
De lu guidare che tzegu a brazzetta

S'isperantzia a ti narrer m'invitat
Ca sende de sa vida pius praticu
Cantu ti naro in sa mente t'inserra

Si setziat ognunu ue meritat
Ti giuro, pius de unu cattedraticu
Lu tias biere a traser'in terra.

NOTTE TRISTA

Est bennarzu, su entu impetuosu
Batter intend'a sa fentana mia
Muidende cun mod'ispaventosu

Notte d'intensu frittu de traschia
De incubos pro me notte funesta
Apportadora de malinconia

Èppuru isco ch'istanott'est festa
Però s'animu meu e s'universu
L'gualè sunu ambos in tempesta

M'intend'in sa mestitzia sommersu
E cosas luttuosas ogni istante
In sa mente mi passan'attraversu

De cust'incubu duru istratziente
Tra me mi nde domando sa cagione
E non cumprendo ma penso distante

Chi tenzo cara prus de una persone
E no ischinde s'istadu attuale
Resto prus trist'in sa riflessione

E penso a cudd'amigu e a su tale
Parente, babbu, sorres, unu frade
No isco s'istan'oe bene o male

So tristu e sol'in sa giovan'edade
Lontanu da amigos e parentes
Circundadu d'intranquillidade

Ahi, cando penzo chi medas viventes
 Sunu regoltos in famiglia insoro
 Faghinde custa pasca sorridentes

E deo tristu, solingu che moro
 Sentz'unu visu amigu chi cunfortu
 Mi pottat dare a su trafittu coro

Cun dolorosu e amaru trasportu
 Mi domando tra me: ma cust'est vida?
 Ah no pro viver goi mezus mortu!

Da s'intimu un fortz'inaudida
 Mi faghet caldas lagrimas versare
 Cun s'anima cuntrita e avvilita

Cantu troppu m'affannat su pensare
 Sos bellos annos de s'infanzia mia
 Sa ch'est partida po non che torrare

Sola, ahimè, no est partida ebbia
 Ca giuttu s'hat cun issa ogn'isperantzia
 Su sorrisu, po sempre e s'allegria

In mente hapo sa dulce rimembrantzia
 Cando mi promittias milli cosas
 Tando si, chi fis bella car'infanzia

Ma s'avvenire de lizzos e rosas
 S'est che nue a su entu dissipadu
 Lassende sas ispinas velenosas

Ma poite, però, triste passadu
M'ammentas in cust'ora de torturas
O non t'hapo bastante suspiradu?

O m'annuntzias noas isventuras
Sas cales m'han lassadu po retaggiu
Ispasimos, turmentos e pauras?

Destinu crudu, ite bellu presagiu
Mi dasa po sa Pasch'e sos Tre Rese
No haias pro me ater'omaggiu

O cherrcr avvertir'est chi mi tese
Chi hapo cominzadu in custa vida
De turmentu, sos annos vintise

S'edade est frisca si, m'appassida
L'has tue miserabile destinu
Su chi das'a s'inerme sempr'isfida

Ma po chi mi bersaglies de continu
E a s'abissu mi tentes d'ogni ora
Non deviù d'ideas su camminu
Ca su chi fui, so e resto ancora.

ORATZIONE FUNEBRE IN MORTE DE SU
POETA REMUNDU PIRAS DE IDDANO
MONTELEONE

Como bos giamo a sa solenne proa
Dilettas sorres noe d'Elicona
Chi enzedas a bolu a Biddanoa

A cust'anima eletta, cara e bona
Ch'est riposend'in cussa frita bara
Faghideli cordogliu cun corona

Accumpagnend'a sa lacrima amara
Altu su ostru lugubre lamentu
S'intendat da Minerv'a su Limbara

Da Monte Serpeddì a Gennargentu
Attraasset s'interu Campidanu
Da Monteferru fin'a s'Arquentu

Invitade sos c'hana coro umanu
Chi lèene parte a su dolu profundu
Ca tramontadu est s'Astru Isolanu

Annuntziande ch'est mortu Remundu
De sos palcos s'artefize zigante
De tottus primu a nisciunu segundu

Bos evoco, cun coro trepidante
Antigas de Sardigna Umbras Elettas
Benide a onorare in cust'istante

A su poeta, chi tra sos poetas
 Had'a lassare fam'imperitura
 De su Parnasu in sas sublimas vettas

Tigelliu, da sa tua antiga altura
 De sos colles de Roma prestu fala
 E giamu da s'insoro sepoltura

A Carboni, Araolla e Delitala
 E invitate su grande cantore
 C'ha piantu a Gisella in Baddemala

Dae Karalis Efisiu Pintore
 Beni, e parte a custu luttu lea
 E cola dae Posada Ciscu Dore

Su chi de Eleonora d'Arborea
 Hasa cantadu in versu 'e Logudoro
 Su triunfu e s'eroica epopea

E tue, Satta, faru de Nuoro
 Ch'in su saltu, sa tanca, sa bardana
 Cantas de sa Barbagia fortz'e coro

Da e sa tua Tempio Pausana
 Bainzu Pes, in abitu talare
 Nara un'orazione cristiana

Chi a Remundu potat perdonare
 Calchi mancanzia, Deus Soberanu
 Chi fidi umanu e d'est umanu errare

E intro su conventu de Oristanu
A tie naro, aiò, Luca Cubeddu
Prega che cando fisti Frantziscanu

Cun Pisurzi, Murenu e Porqueddu
A s'attittidu in versos dade isfogu
In cumpagnia de Padre Cosseddu

Branca, Mereu cun Ibba e Delogu
Su chi fisi de Ittiri ornamentu
Famosu fizzu de su Meilogu

In ispiritu intrade in s'apposentu
Ue est drominde po s'eternidade
De iddanoa su raru talentu

Poi cun issu su olu ispiccade
In s'eternu ispatziu infinitu
E innos de gloria a Deus cantade

Eternu gosu appedas in s'abitu
Inue sunu tottus sos beados
C'han tentu 'e sa salvesa su meritu

Prega, o Remundu, po sos c'has lassados
In tant'inconsolabile dolore
De sa tua presenza orfanados

Non fis'ebbia un'improvvisadore
Fis credente e onestu zittadinu
Esemplare maridu e genitore

Nobile coro nutrias in sinu
Faghinde tuos anzenos dolores
De su ezzu e de s'orfanu mischinu

Signore pius signore e sos signores
Inimigu de tramas e de brigas
Ma amigu de dottos e pastores

Ligadu a sas usantzias antigas
De domo, de idda e de su saltu
Sighinde sas atavicas istigas

In te faghian ispiccu e risaltu
Tantas dotes morales e sublimas
De calcunu istruidu pius in altu

Cantos segretos e cosas intimas
Nos hamus, sende solos cunfidados
Chi mai hap'a esprimere in sas rimas

Parca crudele nos hat separados
Cando creia 'e t'iscultare ancora
Faghinde gestos e versos alados

Riposa in paghe in s'ultima dimora
Anue tottus devimus annare
E Deus t'appad'accoltu da cust'ora

Ca toccat solu a issu giudicare
Ogni opera nostra e ogni atzione
Po nos punire o po nos premiare

E fino cust'umile oratzione
Dende tantas sentidas condoglianzas
A sa famiglia e a Monteleone
Ca est dovere in custas circustanzias.

**AUGURIOS DE PASCA
A UNU ZEGU NASCHIDU**

Già chi propitzia est s'occasione
Chi Pasca d'arrivare est in protzintu
Retzi cust'auguriu distintu
Cun fraterna sintzera affetzione

Chi a s'ora de sa Resurrezzione
De iere ti torret s'istintu
Che Tobia faghindedi cunvintu
Colpidu est de matessi afflissione

Ma no, frade istimadu, calmu giughe
S'isventura de Tobia e de Omero
Prega a Cristos po nois mortu in rughe

In Issu cunfidende creo e ispero
C'a tie diat cudd'etema lughe
Chi non connoschet manzanu né sero.

A LUGHIA SU PRIMU AMORE

Nara, gentile Lughia
M'has calchi olta pentzadu
Riflettinde in su passadu
De cando t'istimaia?

S'edade hat mudadu in me
Sos gustos, su sentimentu
Ma mai su caru ammentu
Hapo mudadu de te
Che prima vivu est, mi crè
De su coro in cumpagnia
Po chi pensaredi ebbia
Esulto che in prim'ora
E tue m'amas ancora
Nara, gentile Lughia?

Fissu perenne e costante
Sempre in sa mente hap'impessu
Su nomen, su primu amplessu
Chi t'hapo dadu anelante
Paret chi t'ida tremante
Che cando t'hapo abbratzadu
Oh! Momentu fortunadu
De su nostru primu amore
E tue senza rancore
M'has calchi olta pentzadu?

Non su bellu trattu sou
De sa chi amo e adoro
Mi cancellat da su coro
S'adoradu nomen tou
T'amo e ti sognu dae nou
Che de cando t'hap'amadu
Innotzente innamoradu
In s'alba de custu vida
Gai m'ammentas dechida
Riflettinde in su passadu

Non podet, no, su futuru
Cancellare da su pettu
S'amore sublime e nettu
Innotzente castu e puru
Su nomene imperituru
Restat in me de Lughia
Primu sognu 'e pitzinnia
Dulze sublime ideale
E oe t'amo uguale
De cando t'istimaia.

IN MORTE DE SORRE MIA PITANA

Bola fraternu lamentu
Ma cun s'ala luttuosa
Ue in pagh'est in sa losa
Sa chi paga vida hat tentu

Narali amaru tributu
De lagrimas vers'ogn'ora
E chi la suspiro ancora
Solu ritiradu in luttu
E cun oju no asciuttu
Cunservo de issa s'amentu
Ch'est da me ogni momentu
Veneradu e benedittu
Da e cust'animu afflittu
Bola fraternu lamentu

Ahimè, m'ido resortu
Supportare tanta pena
Desoladu in terra anzena
Senza nessunu cunfortu
Poi'teo non so mortu
Non tue diletta rosa?
Custa oghe lastimosa
T'arriwet finz'a sa tumba
Bolende in forma 'e columba
Ma cun s'ala luttuosa

Sa morte in sa frisch'edade
Sempre sorrisos t'hat dadu
Ma che me no has proadu
S'infelice orfanidade
B'idu no has faltzidade
De tanta zente ingannosa
Partis da tant'allegria
In sa menzus pitzinnia
Ue in pagh'est in sa losa

Gloria tenzas intantu
A s'anima eletta e bona
E luminosa corona
Ti fettat su tristu cantu
Po te su meu piantu
Siat eternu cuntentu
Brilles che in firmamentu
Cale luna in notte 'e chelu
Sa chi paga vida hat tentu.

A UNA GIOVANEDDA

Cun s'innotzente candore
D'una cara e pura rosa
Ti presentas rigogliosa
A su mundu ingannadore

Un Eden tottu d'incantu
Custa vida ti presentat
T'affascinat e ti appentat
Cun notas de dulce cantu
E ti lusingat intantu
A libare su fiore
E sognas fortzis s'amore
Sintzeru senza perfidia
Non connoschinde s'insidia
Cun s'innotzente candore

Tottu su mundu beltade
Sognas in sa pitzinnia
Ma bolat sa fantasia
De sa bella prim'edade
E restat sa realtade
Tando delusa e pensosa
Pentzas cun coro affliggidu
Chi su profum'has perdidu
D'una casta e pura rosa

In pettus cun tantu anelu
Ti battit su castu coro
Ca fintas lughes de oro
Paren ti mustren su chelu
Ma sutta su fintu velu
Ch'est cust'adde lagrimosa
Sa cales delitziosa
Pares mirendela tue
Ca sentza umbra né nue
Ti presentas rigogliosa

Non fides, no, criatura
In custas bramas fallaces
Sas gioias sunu fugaces
Solu sas penas han dura
Sos che sa tua ermosura
Ammiran cun tantu ardore
E ti mustran cun fervore
Su coro dared'in manos
Sun faltzos lusingos vanos
De su mund'ingannadore.

INGRATITUDINE

Fortzis non t'hap'istimada
As coro negare custu?
So deo istadu s'ingiustu
O ses tue ingiusta istada?

T'hapo amadu a d'ogni costu
Giustu, costante, leale;
Creindedi d'esser tale
Chi m'esseressu corrispostu
Invece tott'a s'oppostu
In'ira ti ses mudada
E prosighis ostinada
In tanta cruda veementzia.
Ingrata senza cussentzia
Forzis non t'hapo istimada?

Ecco su rimursu intantu
Chi t'à su coro toccadu
E t'abbizas c'as mancadu
Ma cando: pustis de tantu!
C'happo penadu e pianu
E de lagrimas infustu
Como punire t'es giustu
De su matessi turmentu!
Ca su meritu n'as tentu
As coro negare custu?

Ma s'in su candidu pettu
Candidu aias su coro
E dura non fis che moro
Daremi pena a dispettu
Naras c'a su meu affettu
Ricambiad'as disgustu
E fortzis pro te fi giustu
Su m'ider angustiadu.
E si t'hapo abandonadu
So deo fortzis s'ingiustu?

Ti giuro solennemente
Non ti odio, certa resta
Ma non ti lighes in testa
Chi t'istime novamente.
De me tes'aer presente
Solu sa vida passada.
Canno pius desolada
Vives rifletti però
Si fuis giustu e lu so
O ses tue ingiusta istada.

REQUISITORIA

I

Che ispergiuru intradu in iscèna
As fat'una figura miserina...
S'innocentzia tua cristallina
Fu trulla che fiumene in piena...

E salvadu ti sese a malapena
De ti ponnere che polcu in chirina
Ma però sa giustiscia divina
Non l'imbroglia comente sa terrèna!

Sa natura in sa bizzarria sua
Che Gianu duas faccias t'at dadu
Una de santu, una 'e sola crua...

Giuda, basende a Cristos at giuràdu
Ma l'à traitu bendindelu a cua
E tue ses de Giuda imparentadu...

II

Delusu as finas cuddos mammallucos
Cun sos tuos fanaticos sermones...
Ma non bogana aranzu sos saucos
Ne i sos lupo partorin anzones

E ne canariós diventan sos cuccos
Solu colvos estidos de paones.
Su prossimu imbrogliende in milli trucos
Tue ses un'e cussos campioni!..

Sa morte non ti prego, anzis estesa
Sa vida tua siat annos chentu
Pro chi apas de cumpanzos de etzesa

Rimorsu cun taldivu pentimentu
Semper presentes, che pane in sa mesa
Pro ti render amàru ogn'alimentu!..

III

Tue de custa idda ses castigu
Cun repentis umòres improvvisos...
De masòne sos pegos àn divisos
Pro su banale politicu intrigu...

A d'ogn'ordine tou fun detzisos...
Coment'e i sos Nibbios e Grisos
De cudd'Innominadu o Don Rodrigu...

Si fui istadu che a Borromeo
C'Abbondiu a sa testa samunadu
Gai a tie, tia fagher deo...

Issu cunvètidu à s'innominadu
Chi ti cunveltas tue non bi creu
Ca ses unu dumoniù incarnàdu!...

IV

Sos Vangelos, impreados às inue?
De Marcu, Luca Zuanne e Mattèu.
S'in terra torrat su F'izu e Deu
Pighend'a Su Golgota, a pesa-rue

T'zeltamente non dias esser tue
Su segundu Simone cirenèu...
Dias narrer, che unu fariseu:
Gia chi ses rutu, resta rutu in cue!

Pro culpa tua medas sunu rutos
(calcunu mortu, atere in presòne)
e cummòvidu non t'àn cussos lutos...

Ca ti ses fatu su capurione
De un'infima cricca e farabuttos
De sa tua matessi intenzzione!..

V

Paba Leone Primu, ad'affrontàdu
A Attila, (de Deus su flagellu)
Non giughiat armàdu unu drappellu,
Fu solu de sa Santa Rughe, armàdu

Assor'es tra sos duos, comintzadu
Tra ateu e credente, su duellu
Su fratricida crudele ribellu
Sest'in fine a sa rughe umiliàdu!

Tue no usas rughe ne istòla
Ne legges in su santu breviàriu
Mancu colcàdu restas a sa sola!..

E pro paura de calchi sicariu
Giughes sempre in busciaca sa pistola
Gai t'àn'imparadu in seminàriu?

VI

Chie in Deus prègada e cunfidada
Giughet semper serena sa cussentzia
Non timet, si drommit e s'ischidada
Isperende in sa sua Providentzia

De custa vida, dogn'eventu isfidada
Cun amore, bontàde e cun passentzia
Pensende ca, est'Issu chi guidada
Tota sa nostra terrèna esistentzia.

Tue invece a die che a notte
In domo, in crèsia, peri sos caminos
Times, ca in su coro giughes bua...

Faghinde sa figura e Don Chisciotte
Chi mostros li parian sos mulinos
T'ès finas inimiga s'umbra tua!..

VII

Da chi da custu mundu che ses fora
(c'a morrer est de tottus sos umanos)
Non an'andare sos parrochianos
A ti chilcàre in s'ultima dimòra

Né frores deponner a ogn'ora
Coment'est'usu de sos cristianos
Né a pregàr'a rosàriu in manos
Pro tè, a Deus e Nostra Signòra.

Ma fortzis in sa tumba ana a iscriere
Chi fust pastòre de santa guida.
D'afflitos e de poveros cunfòrtu.

Lezinde cussu, sa zente ada a riere
Comente às fattu rier sende in vida
Ana a rier de tè a pustis mortu!

A UNA RICCA ISTUPIDA

I

Ite m'importat sa tua ricchessa
Sa tua faltza truccada beltade?
Macca! Cres fortzis chi sa povertade
Siat in custu mundu una bassesa?

Mentre prus alta de sa tua grandesa
Est de su poverittu s'onestade
Chi bestit in modesta calidade
Ma brillat cun sa sana giovinesa

Ca ses ricca ti crese bella e colta
A furias de tintas e profumos
Invece ses deforme, brutt'istolta!

Lassa, abbandona sos vanos presumos
E persuadid'una bona olta
Ch'in testa de patzia portas fumos

II

Giuro chi tias cherrer comportare
Sos bellos donos de mamma natura
C'a tie in'isquallida misura
Ingrata t'hat devidu dispensare

Ma no, tue di debes cuntentare
De ricchesa, sas cales t'assegura
Ch'est fatta de sos mannos cun s'usura
E cun atteru illecitu operare

Ma tue m'has a narrer cun furore
Ite importad'a tie in funnu in funnu
Si babbu meu fit unu birbante?

Ma ti risponno su chi hat nadu Dante
Medas boltas sos fizzos in su munnu
Pranghen sos fallos de su genitore

MODELLU A SANTU LUSSORIU

Martires degheotto miliones
 Annoverat s'Ecclesia Romana
 Sos primos su martiriu soffrid'hana
 Sutta sas deghe persecutziones...
 E de i custos prodes campiones.
 Lussulzu est in s'eroica ischiera...
 Roma pagana potent'e fiera.
 Inimigh'e sa zente cristiana.
 Roma fiera potente pagana
 Inimigh'e sa cristiana zente.
 Roma pagana fier'e potente.
 Cheret distruer'iniquamente
 De Cristos sos triunfos e onores...
 Fint deghe barbaros persecutores,
 C'haiant cor' 'e tigr'e de leone...
 Domitzianu, Traianu e Nerone
 Decio, Adrianu e Massiminu,
 Valerianu simile'a Cainu,
 Marc'Aureliu, e Diocletzianu
 A Cainu simile Valerianu
 E mostu fit Settimiu Severu...
 Però est rutta roma e i s'Imperu,
 Ma sa dottrina e Cristos distrutta est no!
 Est rutta Roma e i s'Imperu però
 Ma sa dottrina e Cristos no est distrutta...
 Però este s'Imperu e Roma rutta.
 Ma distrutta no est de Cristos sa dottrina...
 C'assor'haiant fide adamantina.
 Sa chi nos est mancada in cust'ora...

III

Prite perfidamente tue ries
De s'umiltade de s'umana vida?
Ries cand'ies una malestida
E beffarda sa cronaca nd'iscies

E tue, chi ses beffe, non ti bies?
Miradi bene si non ti ses bida
Ca pares una fozza colorida
Cand'est attonzu in sas ultimas dies

Si ti pretziaian cantu bales
Fisicamente in sa vida terrena
Se vera negativ'e sos mortales!

Sa domo tua 'e benes est piena
Cantu tue piena ses de males
E cantu bene b'at ti siat appena.

C'haiant fid'adamantina assora.
 Sa ch'in cust'ora mancat e non este...

Oe in sa faccia e su globu terrestre,
 Sunt pagas sas cussentzias perfettas...

Sunt tramontados sos apologetas,
 E sos lassados esemplos insoro.
 Po un'istante restan in su coro,
 De chie de dottrinas est digiunu...
 Tramontados sos apologetas sunu,
 E sos insoro esemplos lassados...
 Sunt sos apologetas tramontados.
 C'haiant coro giustu e fide ardente...
 Tertellianu, Giustin'e Clemente.
 Eusebiu, Austin'e Tatzianu,
 Clemente, Giustin'e Tertellianu
 Tatzianu, Eusebiu Austinu,
 Tertellianu, Clement'e Giustinu,
 Atenagora, Amovia e Fieinu,
 Marsilio, e Felice atteretantu...
 Oppressiones martiriu e prantu,
 Hant fundadu sa nostra religione...
 (Non su fanaticu ipocritu deliriu)
 Oppressiones prantu e martiriu,
 Non sas porporas rasos e cordones...
 Prantu martiriu e oppressiones.
 Non sos cordones porporas nè rasos...
 (No a sacros pavimentos fintos basos)
 A simulacros genuflessiones (!?)
 E non de obbligadas vocatziones.
 Ma de pios e de onestos sentimenti!...
 Non fintos basos a sacros pavimentos,
 Né genuflessiones a simulacros,

Non fintos basos a pavimentos sacros.
 Né meas culpas nè punzos a pettu...
 Ma onestade, prudentzi'e rispettu,
 Bontade, fid'amore ubbidientzia,
 Ma onestade, rispett'e prudentzia
 Fide, amore, ubbidientzi'e bontade,
 Prudentzia, rispett'e onestade,
 Bontad'e fide ubbidientzi'amore...
 Fint custos de su Nostru Redentore,
 Sos preigados printzipios giustos!
 Fint de su Nostru Redentore custos
 Sos printzipios giustos preigados...
 (Ma oe tzertos unos cammuffados)
 Rinnegan Cristos fide anim'e Chelu...
 Frades, si meditamus s'Evangelu
 Lassamus sas terrenas vanidades...
 S'in s'Evangelu meditamus frades,
 Sas vanidades terrenas lassamus
 Frades s'in s'Evangelu meditamus.
 Sas vanidades lassamus terrenas...
 Aggiudu dend'a sos chi sun'in penas,
 Consolende su nud'e su famidu,
 Cristos puru sos nudos hat bestidu,
 E dad'hat pan'a chie fit digiunu...
 Aggiudu dend'a sos ch'in penas sunu
 Cunsolende su famid'e i su nudu
 A sos chi sun'in penas dend'aggiudu
 Su nudu su famidu consolende
 A sos chi sunu in penas aggiudu dende
 A Cristos ubbidind'e immitende
 Ch'est mare d'infinitas sapientzias...

Oe in faccia a su globú terrestre
 Sunu pagas perfettas sas cussentzias

Rispetto opinioniones e tendenzias
 E azzetto si sunt francas e leales.
 Però sempre detesto tzertos tales
 (lupos chi si cammuffant de anzones)
 Tendenzias rispetto opinioniones
 Si francas e leales sunu atzetto.
 Opinioniones tendenzias rispetto
 E atzetto si leales francas sunu...
 Ma tollerare non pott'a nisciunu
 Chi po mi coglionare mi lusingada
 Mancari a falzas tintas mi dipingada
 Cant'hant fattu de bellu Appoll'e Giotto...
 Ma tollerare a nisciunu non potto.
 Chi deo ida cun sos oios suos...
 Ca ido bene estidos e nuos...
 Opulentes, attatos e famidos.
 Ca ido bene nudos e bestidos
 Famidos, e attatos opulentes...
 E b'id'onestes e delinquentes.
 E cuddos ch'intzegare a mie crene...
 Ca bestidos e nudos ido bene
 Opulentes, famidos e attatos
 Ca sutta custos pannos male trattos...
 Regnat su bonu sensu non s'ottusu...
 Oe tres milliones sunu e prusu.
 Bratzos sentz'opera e buccas senza panel..
 Faghinde vida peus de su cane
 Nudos che Cristos in mes'e ladrones...
 E oe sunt prus de tres miliones...
 Bratzos sentz'opera e senza pane uccas...
 De sas promissas vanas e caducas
 Semus de issa sa trama idinde...
 (De cristianas e non cristianas)
 De sas promissas caducas e vanas.

Semus de issa idinde sa trama...
 Montecitoriu e palattu Madama
 De reformas hant fattu repertoriu...
 Palattu Madama e Montecitoriu
 Repertoriu e reformas hana fattu.
 Montecitoriu e Madama palattu
 Repertoriu han fattu de reformas...
 Però domando, progetos e nòrmas
 Ma cando las mandan'in effettos?
 Però domando normas e progettos
 Ma in'effettos las mand'e cando?
 Però progettos e normas domando
 Ma in effettos e cando las mandana?
 Sos famidos pane chi domandana
 Oe cun oiu male sunu idos
 Ca domandan pane sos famidos'
 Chi sunt sobilladores sunu nende
 Sas parzialidades sun torrende
 Tott'hant promissu ma dadu hat nisciunu!
 Torrende sas partzialidades sunu
 Tott'hant promissu ma nisciun'hat dadu...
 E po beffe mi naran frade amadu!..
 Vittoria hamus tentu e semus frades...
 Torrende sunt sas partzialidades
 S'Italia est divisa in duos puntos...
 Da un'ala sos ateos presuntos.
 Da s'attera sos fintos cristianos...
 (invece semus tott'italianos!..)
 Dstruinde cantu e bonu hamus connottu...
 Invece italianos semus tottu.
 Bonus solu a promitter cosas vagas

Oe in faccia e su globo terrestre.
 Sas cussentzias perfettads sunu pagas...

Lussulzu, tue sana sas piagas.
 Subra de tottu de s'anima umana...
 Tue Lussulzu sas piagas sanas
 C'affligini s'inter'umanidade...
 Invoca sa Divina Maestade
 E toccas cun sas gratzias su coro
 De sos avaros chi morint po s'oro
 Frena sa manu ladra e assa ssina...
 Invoca sa Maestade Divina.
 E cun sas gratzias cun su coro tocca
 A sa Divina Maestade invoca
 Ch'Issa cancellede sas barbaras tramas...
 Istuda de sos odios sas fiamas.
 E sas annadas malas muda in bonas
 Fertiles rende sas aridas zonas
 De fruttas, ervas, laores e barnas...
 De sos odios istudas sas fiamas
 E sa annada mal in bona muda
 Sa fiamma e sos odios istuda
 Sos inimigos s'abbratzent che frades...
 Illumina sas autoridades
 Permesu de sa grazia Divina
 Sas Autoridades illumina
 Civile, militare e religiosa...
 Ch'in s'ora calma e in sa burrascosa.
 De s'altu compitu a s'altessa siana...
 Ch'esempiu de civismu sempre diana
 In publicu in uffizios e tempios
 Chi dian sempre de civismu esempiu.
 Po s'ordine e benessere comunu...
 Tutela e libertade hapat dognunu
 Dirittu sacru de tottu sas zentes...
 E t'imploro e tantas mamas chi t'amentes.

C'a tie pregana affrantas e serias
 Tra maladies, luttos e miserias
 Brivas de pane po sa prole insoro!
 De tantas mammas t'amentes t'imploro.
 C'a tie pregan serias affrantas
 Chi t'amentes t'imploro e mammas tantas
 Chi pranghen'e pregan'a s'acua...
 Si tue podes, cun sa grazzia tua
 Cunforta cussas mammas in tristura!
 Da sas presones, e domos de cura.
 Intende su lamentu e sas presones.
 Da sas domos de cura e da presones
 Intend'e sas presones su lamentu
 Sana de ogni infirmu su turmentu.
 Torra dogn'innotzente a domo sua...
 Frena de tantos barbaros sa fua.
 Protegge, ampara sos isfortunados...
 E dà fortun'a sos'innamorados
 E a chie de mele est'in sa luna.
 A sos innamorados dà fortuna
 E in sa luna de mele est a chie...
 Mitiga sos affannos de ogni die
 Sos chi sunu in s'edade decadente...
 D'ogn'onestu tribagliu de manu e mente
 Guida, premia, cumpensa e onora...
 D'ogni emigradu chi da idda est fora.
 Torret cun sorte salute e onore...
 A su Sotziu ancora e a Priore
 S'ispeciale beneditzione .
 A zent'e fora e popolazione
 Chie m'est in presentzia o assente...
 Da su palattu fin'a su tuguriu

Imbio custu caru pensamentu
Senza distingher né sessu sé cetu.
Retzi Monterra su meu auguriu
Chi rinnoves sa festa po annos chentu
Saludo a tottus cun fraternu affettu.

ARGUMENTU 'E PREGADORIA

O santos de su nostru calendariu
 Iscultende sa netta 'e custa tzia:
 Faghide coiare a tzia mia
 Mancari siat cun d'unu vicariu;

Si no vicariu assummancus para
 E chi peleet po issa e po nois
 Attinn'a domo po virtude rara
 'ogni die una bertul' e' cocois;

Dadeli unu pudesciu casteddaiu
 Chi siat issu dottore o bastasciu,
 Piscadore, ispatzinu o catzolaïu
 Bastet chi nerzat issu ca "est masciu".

Assora tzia, za solis cumparrer
 Passizenne in tzittade impelliciada,
 Ma si murrunzu calchi die b'ada
 "baidinci biddunca" t'ad'a narrer;

E tue assora in gergu cittadinu
 As a risponner cun malu faeddu
 E dh'as a narrer: "castia, Giuachinu
 La ca ti segu sa facci a gutteddu!"

E si dhi dades un'imbrigone,
 No ch'istrampet a tzia de su lettu
 E no si 'endhat po cussu diffetu
 Lentzolos, cabidales e saccones.

Dadeli mezus unu possidente
 Mancari etzu siat e cadruddu
 Chi in conca no portet mancu tzuddu
 E in bucca no portet una dente.

O unu zovanu bellu e sembiente
 Ma ch'istrambicu siat totalmente,
 Chi cun d'un'ogu miret a ponente
 E cun s'ateru osservet a levante.

Si dh'azis destinadu unu fiudu,
 Prego a bois, celeste gerarchia,
 Binnighi fijos chi tenzat ebbia,
 poberu, conca mala, iscultzu e nudu.

Bàstat sa brulla, prestu a sa dimora
 Torres sana e cuntenta, cara tzia
 Semus cun ansia ipettendhe ancora
 T'ider torrada a sa 'omo natia

E prestu realizes s'ideale
 De sos sognos chi as in pensamentu
 e-i su restu 'e sa vida mortale
 longu ti siat e pren' 'e cuntentu,

Ma chi sa data no siet lontana
 Chi cun su velu pighes a s'altare
 Ca tenzo bramosia de ballare
 E de pappare druches tenzo gana.

Finu cun custu sa pregadoria,
 ti saludamus totu in unione,
 T'abbratzo cun sincera affetzione:
 A nos 'ier a presse, cara tzia.

✻ A SA MATESSI TZIA

De sas tuas litanias
 Cantas sa felice prora
 E deo t'auguro ancora
 Tzia, chi felice sias,
 Lezinne sas rigas mias
 Crescat su diletu tou,
 De vida un'impulsu nou
 Intennas sero e manzanu
 E che puzone in beranu
 Cantes cun boghe canora
 Sa bella e felice prora
 De sas tuas litanias.

T'orr'a sa terra diletta
 Ch'est niu de dultze incantu
 Inu' 'e irde an su mantu
 S'adde, su pranu, sa vetta,
 Pura, frischissima e netta
 'essit s'abba a sa funtana,
 Fine, balsamica e sana
 S'aria tirat intantu
 E de puzones su cantu
 In melodia perfetta
 Ca custa est terra diletta
 E niu de dultze incantu.